

## LA SCUOLE

## Ancje intal "Stringher" la marilenghe e devente protagoniste

**A**e conclusion dal an scolastic, prime di suspindi il nestri zir pes scuelis dal Friül che vie pal istât a son in vacanze, o fasin un salt intune scuele superiôr, par cognossi lis ativitâts che si son davueltis par furlan intal Istitut superiôr «Bonaldo Stringher» di Udin.

Il progjet che si è svilupât vie pal an scolastic 2006-2007 al è, ancjemò une volte, une testimoniance di ce tant ben che si pues lavorâ par furlan in ogni ordin di scuele.

Il «Stringher» al è un istitût pal cumierç e pa dal turisim cun disciplinis di studi specialisticis ma, in fuarce de ativitât par furlan, a son stâts aprofondîts argomentis vore impuartants pal insiorament de culture dai arlêfs, cu la guide dai insegnants di talian, storie, economie e tecniche dal turisim.

Si son impegnâts tal lavôr i arlêfs des classis 1e B e 1e L albierrghieris e des classis 2e A e 2e B comerciâls, par un totâl di 85 zovins.

La 5e C turistic e a colaborât pe preparazion di parts di tesis di presentâ al exam di Stât. In cheste classe al è stât svilupât un modul particulâr intitulât *Itinerari di turismo locale - Itinerari della memoria*. Il viaç di une femine de mê famee - La femine te storie, te culture, te societât (in colaborazion cu la Universitât di Udin).

Lis lezions a son scomençadis intal Novembar 2006 par finî intal mê di Mai, e a àn tant che obietîf finâl chel di preparâ un itinerari de memorie pai turiscj, sui lûcs des vueris mondiâls che al sarâ presentât intal exam di Stât. Altris obietîfs a son chel di svilupâ la culture de pâs e de vite civil in dimension europeane, chel di lavorâ in squadre, chel di cognossi il teritori cun esperts e visitis guidadis.

Une altre classe formade di arlêfs cinês, la 3e cin, e a preparât une reclam par un formadi, vincint un premi intun concors!

Vie pal an a son stadis fatis visitis di istruzion, cu lis classis dai prins agns, intal

Museu de Vite Contadine di Feagne e intal Museu «Gortani» di Tumieç e, ca di un pôc, e vignarâ publicade sul *Bollettino dei Civici Musei di Udine* une ricercje sui Cramârs, lis Sedonaris, i Pomarûi e i Gues.

Intal an scolastic 2001-2002, par esempi, lis professoris di talian e storie a àn immaneât il modul di aprofondiment *Lenghe e culture furlane* previodût par sis classis dai prins agns de sezion comerciâl de scuele, par un totâl di 95 arlêfs.

I obietîfs principâi des ativitâts a son stâts: doprâ la lenghe furlane, cognossi la storie, la culture e lis tradizions dal teritori, cognossi il centri storic de citât di Udin, lis testimonianceis leteraris e i documents in lenghe furlane.

Par chel che al rivuarde i obietîfs transversai dal Istitut, ogni classe e à lavorât par 45 oris clamadis «di aprofondiment», dopomisdì, doprant la lenghe furlane e la lenghe taliane pai students che no capissin la marilenghe.

Cun cheste esperience si a vût tancj risultâts cuntune varietât di produzions culturâls dai arlêfs, come une dozene di disens a lapis e a colôrs di cualchi monument o viodude dal centri storic di Udin, une sielte di poesiis di autôrs furlans, une relacion su lis lezions e su la visite guidade ae citât.

Un lavôr che al è lâc indevant insiemit cul modul *Lenghe e culture furlane* al è stât titulât *A la discvierte dai Celtics: didattiche sul teritori* organizât de Comunitât Montane dal Cjanâl dal Fier, in colaborazion cu la Provincie di Udin, i Museus Civics e la Soreintendence ai Bens Culturâi di Udin e lis Universitâts di Udin e di Triest.

I students a son stâts une vore contents di vè podût praticâ ancje ativitâts manuâls sui temis des cjasis, artesans e metalurgjie, lavorant il ram e lis telis cui telârs, come che a usavin i Celtics.

Chei che a vuelin savê altris notiziis sui lavôrs fats in cheste scuele superiôr, a puedin fracâ: [www.stringher.it](http://www.stringher.it).

**Paola Cainero Camilotti**